

Tarikh Dibaca: 01 Mei 2026M / 13 Zulqa'dah 1447H



KHUTBAH JUMAAT

Tajuk:

***“KERJA BUKAN SEKADAR
MENGEJAR HABUAN”***

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR

"KERJA BUKAN SEKADAR MENGEJAR HABUAN"

الْحَمْدُ لِلَّهِ الْقَائِلِ : يَتَأَيُّهَا الَّذِينَ ءَامَنُوا لَا تَخُونُوا اللَّهَ وَالرَّسُولَ
وَتَخُونُوا أَمْنَتِكُمْ وَأَنْتُمْ تَعْلَمُونَ.¹

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا
عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ
وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ اتَّقُوا اللَّهَ، أَوْصِيكُمْ وَإِيَّايَ بِتَقْوَى
اللَّهِ فَقَدْ فَازَ الْمُتَّقُونَ.

قَالَ اللَّهُ تَعَالَى : يَتَأَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ.²

Muslimin yang dirahmati Allah SWT sekalian,

Saya menyeru agar kita bersama-sama meningkatkan ketaqwaan kita kepada Allah SWT dengan melaksanakan segala perintah dan meninggalkan segala perkara yang dilarang-Nya. Semoga kita semua diberikan kebahagiaan dan kejayaan di dunia dan di akhirat.

¹ Al-Anfal: 27.

² Ali-'Imran: 102.

Pada hari yang mulia ini mimbar akan membicarakan khutbah yang bertajuk **"KERJA BUKAN SEKADAR MENGEJAR HABUAN"**.

Muslimin yang berbahagia,

Kita sebagai khalifah di atas muka bumi ini sebenarnya memikul amanah dan tanggungjawab yang besar dalam memakmurkan kehidupan. Amanah ini tidak akan terlaksana tanpa usaha dan pengorbanan, dan antara jalan utamanya ialah melalui pekerjaan. Dengan bekerja, kita bukan sahaja memenuhi keperluan asas kehidupan seperti makan minum, tempat tinggal dan perbelanjaan harian, bahkan hakikatnya kita sedang menjalankan tanggungjawab sebagai hamba Allah SWT dan anggota masyarakat.

Dalam pada itu, Islam sangat menitikberatkan usaha mencari rezeki yang halal. Sikap malas dan suka bergantung kepada orang lain tanpa keperluan adalah sifat yang ditegah, kerana ia merendahkan maruah seorang Muslim. Sedarlah bahawa seorang Muslim yang berusaha dan berdikari adalah lebih mulia daripada mereka yang memilih untuk memintaminta sedangkan dirinya masih mampu bekerja.

Dalam hal ini, tidak kira apa jua bidang yang diceburi sama ada sebagai peniaga, petani, nelayan, pekerja pembersihan atau apa sahaja jenis pekerjaan, yang paling utama ialah memastikan setiap rezeki yang diperoleh datang daripada sumber yang halal dan diberkati.

Rasulullah SAW sendiri mengajar kita tentang nilai usaha dan maruah dalam bekerja.

Hadis yang diriwayatkan daripada al-Zubair bin al-'Awwam *Radiallahuanhu* bahawa Rasulullah SAW bersabda:

لَأَنْ يَأْخُذَ أَحَدُكُمْ حَبْلَهُ فَيَأْتِيَ بِحُزْمَةِ الْحَطَبِ عَلَى ظَهْرِهِ
فَيَبِيعَهَا فَيَكْفِيَ اللَّهُ بِهَا وَجْهَهُ خَيْرٌ لَهُ مِنْ أَنْ يَسْأَلَ النَّاسَ
أَعْطَوْهُ أَوْ مَنَعُوهُ

"Sekiranya seseorang daripada kamu memikul kayu api pada belakangnya lalu menjualnya, maka Allah akan menahan air mukanya (memelihara maruahnya) dengan sebab memikul kayu api itu, lebih baik baginya daripada dia mengemis dan meminta-minta daripada orang lain, kerana boleh jadi orang itu memberi kepadanya atau tidak memberi apa-apa".

(Riwayat al-Bukhari).

Muslimin yang dimuliakan,

Hakikatnya, konsep ibadah dalam Islam bukan hanya terbatas kepada ibadah khusus seperti solat, puasa dan zakat, bahkan sebenarnya merangkumi ibadah umum dalam seluruh aspek kehidupan, termasuk pekerjaan seharian.

Firman Allah SWT dalam Surah Al-Zariyat ayat 56:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ.

"Dan (ingatlah) Aku tidak mencipta jin dan manusia melainkan untuk beribadat kepada-Ku."

Ayat ini memberi kefahaman bahawa seluruh kehidupan kita adalah ibadah apabila dilaksanakan dengan niat yang betul dan menepati syariat.

Maka bekerja juga boleh menjadi ibadah, jika dimulakan dengan niat yang ikhlas kerana Allah SWT, dilaksanakan dengan bersungguh-sungguh, menjaga waktu dan disiplin, serta mengamalkan akhlak Rasulullah SAW seperti jujur dan amanah dalam bekerja.

Namun, apakah nilai semua usaha dan kesungguhan itu. Jika kita masih lalai dalam menunaikan solat dan kewajipan asas sebagai seorang Muslim? Apakah gunanya mengejar keuntungan, tetapi mengabaikan hubungan dengan Allah SWT?

Sebab itulah, pastikan setiap pekerjaan yang kita lakukan bukan sekadar memenuhi tuntutan dunia, tetapi menjadi jalan untuk mendekatkan diri kepada Allah SWT, agar hidup kita sentiasa diberkati dan tidak menjadi sia-sia di sisi-Nya.

Sidang Jumaat dan warga kerja sekalian,

Dalam usaha menjadikan pekerjaan sebagai ibadah, kita wajib memastikan bahawa setiap rezeki yang diperoleh berada dalam batas yang dihalalkan oleh syarak.

Kita juga perlu insafi bahawa setiap perkara yang haram tetap haram hukumnya, walau sebaik mana sekalipun niat di sebaliknya. Islam tidak pernah merestui sesuatu yang haram dijadikan jalan untuk mencapai tujuan yang baik. Kerap kali kita dengar ungkapan matlamat menghalalkan cara yang dijadikan alasan untuk mengejar habuan melalui kerja-kerja batil. Itu tidak benar sama sekali! Sebaliknya, Islam mewajibkan umatnya mencari rezeki hanya melalui cara yang halal.

Oleh sebab itu, sesiapa yang mengumpul harta melalui amalan riba, rasuah, hiburan yang haram, perjudian atau apa-apa amalan yang terlarang,

maka harta tersebut bukan sahaja tidak diberkati, bahkan menjadi beban dosa yang akan dipertanggungjawab di hadapan Allah SWT pada hari akhirat kelak.

Dalam pada itu juga, kita mesti menjauhi sikap-sikap seperti malas, culas, suka bertangguh, pergaulan bebas antara lelaki dan perempuan tanpa sebarang urusan dan sebagainya, kerana semua ini bukan sahaja menjejaskan produktiviti, bahkan mencerminkan kelemahan dalam melaksanakan pekerjaan serta pengabaian terhadap amanah yang telah diberikan.

Sepatutnya kita menjadi pekerja yang berdisiplin, beretika dan bertanggungjawab, agar setiap pekerjaan yang kita lakukan dinilai sebagai ibadah di sisi Allah SWT.

Firman Allah SWT dalam Surah al-Taubah ayat 105:

وَقُلْ أَعْمَلُوا فَسَيَرَى اللَّهُ عَمَلَكُمْ وَرَسُولُهُ وَالْمُؤْمِنُونَ وَسَتُرَدُّونَ
إِلَىٰ عِلْمِ الْغَيْبِ وَالشَّهَادَةِ فَيُنَبِّئُكُم بِمَا كُنتُمْ تَعْمَلُونَ.

"Dan katakanlah (wahai Muhammad), Beramallah kamu (dengan segala yang diperintahkan). Maka Allah dan Rasul-Nya serta orang yang beriman akan melihat amalan kamu itu dan kamu akan dikembalikan kepada (Allah) Yang Maha Mengetahui sesuatu yang ghaib dan yang nyata lalu, Dia memberitahu kamu apa-apa yang telah kamu lakukan."

Sidang Jumaat yang dikasihi,

Bersempena dengan Hari Pekerja pada hari ini, mimbar menyeru seluruh warga kerja agar menghargai pekerjaan yang Allah SWT kurniakan kepada kita dengan melaksanakannya secara bersungguh-sungguh dan ikhlas, kerana tidak semua orang mendapat pekerjaan seperti yang kita ada sekarang.

Insyallah, dengan niat yang ikhlas dan usaha yang bersungguh-sungguh, setiap pekerjaan akan menjadi ibadah, diberi ganjaran pahala serta membawa keberkatan dalam kehidupan.

Saudaraku yang dirahmati Allah SWT sekalian,

Mengakhiri khutbah pada hari ini, mari sama-sama kita menghayati beberapa pengajaran yang boleh dijadikan pedoman dalam kehidupan seharian kita:

1. Umat Islam hendaklah menjadikan pekerjaan sebagai ibadah dengan membetulkan niat kerana Allah SWT, melaksanakan tugas dengan amanah, jujur dan bersungguh-sungguh, agar setiap usaha dinilai sebagai amal soleh dan mendapat keberkatan.
2. Umat Islam hendaklah memastikan setiap rezeki yang diperoleh datang daripada sumber yang halal serta menjauhi segala bentuk pekerjaan dan amalan yang haram seperti riba, rasuah dan penipuan, kerana matlamat yang baik tidak boleh dicapai melalui cara yang salah.
3. Umat Islam hendaklah berdisiplin dan bertanggungjawab dalam pekerjaan dengan menjauhi sikap malas, culas dan bertangguh, di samping tidak mengabaikan kewajipan asas seperti solat, agar kehidupan seimbang antara tuntutan dunia dan akhirat.

أَعُوذُ بِاللَّهِ مِنَ الشَّيْطَانِ الرَّجِيمِ
وَالَّذِينَ هُمْ لِأَمْنَتِهِمْ وَعَهْدِهِمْ رَاعُونَ. وَالَّذِينَ هُمْ عَلَى صَلَوَاتِهِمْ
يُحَافِظُونَ. أُولَئِكَ هُمُ الْوَارِثُونَ. الَّذِينَ يَرِثُونَ الْفِرْدَوْسَ هُمْ فِيهَا
خَالِدُونَ.

"Dan orang yang menunaikan amanah dan janji mereka. Dan orang yang memelihara solat mereka. Mereka itulah orang yang mewarisi. Yang akan mewarisi syurga Firdaus dan mereka kekal di dalamnya".

(Surah al-Mukminun: 8-11).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ
مِنَ الْآيَاتِ وَالذِّكْرِ الْحَكِيمِ وَتَقَبَّلْ مِنِّي وَمِنْكُمْ تِلَاوَتُهُ إِنَّهُ هُوَ
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ الَّذِي أَنْزَلَ الشَّرِيعَةَ، هَدَى لِلنَّاسِ وَرَحْمَةً،
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا
عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ
وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا
بَعْدُ، فَيَا عِبَادَ اللَّهِ اتَّقُوا اللَّهَ أَوْصِيَكُمْ وَإِيَّايَ بِتَقْوَى اللَّهِ فَقَدْ
فَازَ الْمُتَّقُونَ.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا
عَلَيْهِ وَسَلِّمُوا تَسْلِيمًا.³

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ
الْأَحْيَاءِ مِنْهُمْ وَالْأَمْوَاتِ، بِرَحْمَتِكَ يَا أَرْحَمَ الرَّاحِمِينَ.

³ Al-Ahzab: 56.



ISLAMIC SAVOUR OBEEDIENCE

اَللّٰهُمَّ اَعِزَّ الْاِسْلَامَ وَالْمُسْلِمِيْنَ، وَاَذِلَّ الشِّرْكَ وَالْمُشْرِكِيْنَ،
وَدَمِّرْ اَعْدَاءَ الدِّيْنِ، وَاَجْعَلْ هَذَا الْبَلَدَ اَمِنًا مُّطْمَئِنًّا وَسَائِرَ
بِلَادِ الْمُسْلِمِيْنَ.

اَللّٰهُمَّ وَفِّقْ اَئِمَّةَ الْمُسْلِمِيْنَ وَوُلَاةَ اُمُوْرِهِمْ وَجَمِيْعَ الْمُسْلِمِيْنَ لِمَا
فِيْهِ صَلاَحُ الْبِلَادِ وَالْعِبَادِ.

اَللّٰهُمَّ اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِيْنِ، وَنَسْأَلُكَ
بِاسْمَائِكَ الْحُسْنٰى، وَصِفَاتِكَ الْعُظْمٰى، اَنْ تَحْفَظَ بَعِيْنَ
عِنَايَتِكَ الرَّبَّانِيَّةِ، وَبِحِفْظِ وَقَايَتِكَ الصَّمَدَانِيَّةِ، جَلَالَةَ مَلِكِنَا
الْمُعَظَّمِ، سُلْطَانَ سَلَاطُوْر، سُلْطَانَ شَرْفِ الدِّيْنِ اَدْرِيسِ شَاهِ
الْحَاجِ ابْنِ الْمَرْحُومِ سُلْطَانَ صَلَاحِ الدِّيْنِ عَبْدِ الْعَزِيْزِ شَاهِ
الْحَاجِ. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيْقَ، وَالصِّحَّةَ
وَالسَّلَامَةَ مِنْكَ، لَوْلِيِّ عَهْدِ سَلَاطُوْر، تَغْكُوْ اَمِيْر شَاهِ ابْنِ
السُّلْطَانَ شَرْفِ الدِّيْنِ اَدْرِيسِ شَاهِ الْحَاجِ، فِيْ اَمْنٍ وَصَلَاحٍ
وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْاِكْرَامِ. اَللّٰهُمَّ اَطْلُ

عُمْرَهُمَا مُصْلِحَيْنِ لِلْمُوظَّفِينَ وَالرَّعِيَّةِ وَالْبِلَادِ، وَبَلَّغَ
مَقَاصِدَهُمَا لَطَرِيقِ الْهُدَى وَالرَّشَادِ.

Ya Allah! Kukuhkanlah akidah umat Islam berteraskan pegangan Ahli Sunnah Wal Jamaah yang berada di atas jalan Nabi Muhammad SAW dan para sahabat *Radiallahuamhum*, seperti yang telah dirumuskan oleh Imam Abu Hasan al-Asya'ri dan Imam Abu Mansur al-Maturidi, beramal dengan Mazhab Al-Syafi'e dan menerima tiga mazhab yang lain, serta bertasawwuf dengan jalan Imam Junaid al-Baghdadi dan Imam al-Ghazali. Jauhkanlah kami daripada segala bentuk rasuah dan salah guna kuasa, begitu juga kesesatan dan sifat ekstrim, serta lindungilah kami daripada fitnah yang boleh menggugat kesatuan dan perpaduan umat Islam.

Ya Allah! Kurniakanlah keamanan dan kemakmuran kepada negara dan negeri kami. Peliharalah kami daripada segala bentuk bala bencana, fitnah dan musibah. Anugerahkanlah kepada kami para pemimpin yang berintegriti, tegas dan berani menegakkan kebenaran berlandaskan syariat-Mu.

Ya Allah! Lindungilah umat Islam dan Masjid Al-Aqsa di Palestin. Peliharalah mereka daripada kezaliman dan kejahatan, serta kurniakanlah mereka ketabahan, kekuatan, dan kemenangan.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ وَاجْعَلْنَا لِلْمُتَّقِينَ
إِمَامًا.⁴

⁴ Al-Furqan: 74.



ISLAMIC SAVOUR OBEEDIENCE

رَبَّنَا ءَاتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.⁵
عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى
وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ.⁶
فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوا لَهُ عَلَى نِعَمِهِ يَزِدْكُمْ،
وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.

⁵ Al-Baqarah: 201.

⁶ Al-Nahl: 90.